

# September

Omm letzde Sunndaach hott mich moin alde Kummbeer Hubert oogerufe, unn noochdem der mir vunn soine schleschde Aache unn isch emm vunn moine ahle Knoche verzählt hadd frääschder misch: Hannes, du hast letzthin in der Flörsheimer Zeitung vom Monat August geschrieben. In zwei Tagen beginnt der September, hast du auch zu dem etwas zu sagen und zu schreiben?

Ei nodierlich, habb isch ze Antwort gewwe, de erst emol: Dess Wort September hott enn scheene Klong, weil dess hott drei ‚e‘ unn lässt sich su rischdisch flüssisch her-saache. Unn gut singe, weil doo gibt's joo de September-Song, den aach de Frank Sinatra gesunge hott. Doo heeßt dess, ins Deutsche iwwersetzt: „Oh, es ist eine lange, lange Zeit von Mai bis Dezember. Aber die Tage werden kürzer wenn der September eintrifft.“

Moont de Hubert: Ich habe eine Schallplatte vom Sinatra, die suche ich mir heraus und höre mir den Song wieder mal an.

Ja, mach dess, saach isch, awwer aach sunnst ist dess enn scheene Monat, weil die Hitz vumm Summer iss fort und dess Kühle vumm Okdower iss noch nitt doo. De September iss enn Monat sozesaache in Ruhestellung, isch habb enn gern.

Doo seet de Hubert: Na ja, aber deine geliebten Vögel fliegen davon, oder?

Ja, saach isch, omm Neunte iss Maria Geburt, doo fliehn die Schwalwe furt. Awwer doodeferr fonge doo owwe bei de Insel Rügen die Kraniche schunn oo sich ze sommele, um sich ferr ihr Reis nooch Spanien noch emol su rischdisch vollzefuddern. Isch numm oo unn dess kann merr aach lese, dass die sich dissjohr frieher fortmache als sunnst, weil die misse joo nachts im flache Wasser stieh, um ze schloofe, unn dorsch die Trockenheit sinn ihr Schloofplätz knapp. Awwer isch werr merr dess alle paar Daach oogugge, merr konns joo gut im Internet unn dort bei de Nabu verfolsche. Also geesche Ende vumm September uffbasse unn die Ohrn stelle, wenn se iwwer doim Kobb laut trompete dun.

De Hubert war e bissi gekniggd: Na ja, hören kann ich sie noch gut, aber sehen kann ich sie nicht mehr, dafür sind meine Augen zu schlecht.

Isch habb gegrinst. Bei mir isses umgekehrt. Awwer noch ebbes zum September, weil der heert sich su nooch Siwwe oo: Isch habb noochgelese, dess kimmt vumm römische Kalenner, in dem war de September de sibbde Monat.

Wir sind im neunten Monat, seet de Hubert, aber jetzt etwas ganz anderes, Corona betreffend. Weißt du, was ich nicht verstehe? Auf jeder Zigarettenspackung kannst du lesen, wie schädlich das Rauchen ist. Mir bringen die im Fernsehen zu viele Zahlen. Sie sollten besser jeden Abend einen Kranken zeigen, wie der mit den Folgen von Covid-19 zu kämpfen hat, auch nachdem er als Genesener gilt, das würde manchen der Masken-Gegner zum Nachdenken bringen, meinst du nicht?

Isch musst nitt noochdenke unn saach: Naa, Hubert, su wie allsfort weider geraachd werdd, so werdd sich kooner vunn dene iwwerzeusche losse.

Seet de Hubert: Ja, weil jeder denkt, es trifft ja nur die anderen. Mach's gut, mein Freund.